

詩

觸蜀

二雅論一

二雅之說大序既言之矣雖畧而不詳補注雖全不敢確信其出於西河然漢初相傳源流自古且其文辭質茂非毛衛諸人所能作也今其言曰一國之事係一人之本為風天下之事形四方之風為雅雅者政也政有大小故有小雅焉有大雅焉然學者於此有疑焉政孰大於澤及四海者乎小雅之藹蕭澤及四海也政孰大於南征北伐者乎小雅之六月北伐采芑南征也政孰

大於安內攘外者乎小雅之天保治內采薇治外者也
又況常武出車皆行師也卷阿鹿鳴皆求賢也行葦唐
棣皆兄弟也鳧鷖旣醉魚麗嘉魚皆飲酒也一以為政
之大一以為政之小此老師宿儒所畢世而不能通其
說也其所不能通者以其畧而不詳偏而未全也吾欲
取其說而通之則莫若因其畧而詳之就其偏而全之
凡序所謂政之大者法祖也敬天也受釐陳戒也而序
之所謂政之小者燕也饗也小雅燕饗之政也王者以

燕饗之政為小則凡屬於燕享者皆小矣大雅受釐陳
戒之政也王者以受釐陳戒之政為大則凡屬於受釐
陳戒者皆大矣故自鹿鳴以下所言未必皆小以其為
燕饗而作也其君若臣相與賡歌而慰勞則從而繫之
曰小雅雖燕饗之詩不忘釐戒乎然當其燕享則亦燕
饗之詩而已大雅自文王以下所言未必皆大以其為
法祖敬天而作也其君若臣相與受釐而陳戒則從而
繫之曰大雅雖受釐陳戒之詩不廢燕饗乎然當其受

釐陳戒則亦受釐陳戒之詩而已昔者鄭玄嘗言之矣
曰小雅諸侯之樂大雅天子之樂也然學者愈不能無
疑焉旣以天子諸侯之樂別大小矣又從而稽之曰饗
則上取燕則下取天子饗元侯歌肆夏合文王諸侯歌
文王合鹿鳴諸侯於鄭國之君與天子饗元侯同天子
諸侯燕羣臣及聘問之賓皆歌鹿鳴合鄉樂則是天子
不必皆大雅而諸侯不必皆小雅也且夫采薇天保天
子之詩也而謂為諸侯之樂此其所以愈疑也然吾謂

玄之言可與大序互相為証則何也雅者政也序所言者政也而玄所言者樂也有政而後有詩有詩而後有樂周室盛時政在天子故天子有雅詩而諸侯無之然諸侯雖無雅詩而未嘗無雅樂當其為樂則諸侯得進而用小雅此所以為諸侯之樂也既以小雅為諸侯之樂而饗則上取者天子以天下為樂所以示無私也若夫小雅既專為燕饗而作矣然天子諸侯燕饗之樂兼用大雅則又何也曰先王作小雅於燕饗之時故以小

雅為燕饗之詩及後王取詩以合樂則雖受釐陳戒之詩皆可用之於燕饗矣是故國風民間之詩也序所謂一國之事繫一人之本者也大雅小雅王者之詩也序所謂天下之事形四方之風者也然而國君之樂兼用國風而鹿鳴四牡皇華嘉魚諸什則雖鄉飲酒之樂亦得進而用之此先王之樂所以無私也序曰用之邦國焉用之鄉人焉此之謂也

論二

惟序以政之大小為詩之大小舍樂而專言詩舍詩之體而專言詩之事夫是以畧而不詳偏而未全也請言其體則夫大雅之體全乎雅而小雅之體兼乎風全乎雅者其言春容而廣大兼乎風者其言咏嘆而低徊抑非獨言也彼其比於金石調於絲竹者蘆肉豐殺之間必有判然不相為同者今雖不可得而聞然而可以意會也先王以其體之小者歌咏夫政之小者而為燕饗之詩曰小雅又以其體之大者歌咏夫政之大者而為

受釐陳戒之詩曰大雅由夫政之大者而為樂之大天子用之諸侯饗禮亦得進而用之焉由夫政之小者而為樂之小諸侯用之天子燕禮亦得降而用之焉此周政所由興也厲幽以降變雅始作當時君臣之義薄而燕享朝會受釐陳戒之文缺於是賢士大夫憂國愛君哀思怨誹之心油然而生不復悉言其政之大小也但各以體之大小從之而已今觀幽王之世大雅僅二篇而小雅四十有四厲王則有大雅五篇而無小雅此非

幽王之失政小於厲王而厲王之失政大於幽王也刺
幽王者從其體之小者為之則小雅變矣刺厲王者從
其體之大者為之則大雅變矣變者時為之也當幽王
之後而雅亡矣大雅尤其先亡者此幽王之時所以小
雅獨多也昔者季札觀樂工為之歌小雅曰美哉思而
不貳怨而不言其周德之衰乎猶有先王之遺民焉為
之歌大雅曰美哉曲而有直體其文王之德乎夫小雅
之鹿鳴天保不全乎周哀而大雅之民勞桑桑不全乎

文王也季札特就其多者論之而已從其多者論之於小雅之中而得其思與怨者焉則小雅非哀而亦哀之漸也由此觀之季札以大小為盛衰而大序以正變為盛衰則以小雅為變體之多焉爾且夫季札固精於言體矣其於大雅曰曲而有直體言其體之直則彼思與怨者其不能不以曲為體可知矣曲者思之至而怨之深也思至故不貳怨深故不言思與怨者幽王之時為之思而不貳怨而不言則非幽王之時為之而文武成

康之澤為之故曰先王之遺民也由序之言政通於季
札之言體夫然後畧者可詳偏者可全也

南陔六詩論一

南陔六詩至秦而亡今所存者古序發端一語而已自
古序外漢儒未嘗贅焉以是知六詩之序獨古也詩三
百一十有一篇存者三百五篇漢儒皆於古序之外引
而伸之徃徃牽合附會有害詩意蓋自二毛以來及于
衛宏皆以講師所說遞相傳授各彙所聞補綴於古序
之後沿習既久皆稱為西河所授不能復辨其非矣不
知古人作序語短而意長辭質而旨奧如序關雎曰后

妃之德蓋舉詩中所已言者綜括其要而意中之言無窮也序桃夭曰后妃之所致蓋舉詩中所未言者直探其隱而其言外之意愈無窮也漢儒則不然其序關雎也則綴之曰哀窈窕思賢才而無傷善之心焉序桃夭也則綴之曰男女以時婚姻以正國無鰥民也於是其義始隘其旨始偏舉詩人意中之言與夫言外之意泯沒而不可復見矣則甚矣序之害詩也非序之害詩而講師之言足以害序也今觀南陔六詩既亡而所存者

僅古序發端一語而已以是知三百五篇之序皆以此
發端一語為古而其餘非古也昔者程大昌嘗引鄭玄
釋南陔六詩之言曰六詩發序之語古嘗合編至毛公
始分冠篇首則鄭玄在漢蓋嘗親見古序然則發端一
語之古其來已遠若程大昌者庶幾可與言詩之徒也
哉

論二

自宋儒疑毛衛之言并疑古序又因古序而并疑南陔

六詩謂六詩未嘗亡也以其為笙詩故但有聲而無辭耳觀於鄉飲酒禮之言曰笙入三終而不言歌是以知其為有聲無辭也不知古人作詩出口為歌入笙為吹比歌以瑟輔笙以磬豈有無其辭而可謂之詩也哉今就鄉飲酒禮言之其曰工入升歌三終主人獻之者謂工升堂而歌鹿鳴四牡皇華每一篇而一終三篇既終則主人酌以獻工焉此升歌之事也其曰笙入三終主人獻之者笙入於堂下奏南陔白華華黍亦每篇而一

終三篇既終主人亦酌以獻焉此笙入之事也曰間歌
三終者間者代也笙與歌皆畢則堂上與堂下更代而
作焉堂上歌魚麗則堂下笙由庚是為一終堂上歌南
有嘉魚則堂下笙崇丘是為二終堂上歌南山有臺則
堂下笙由儀是為三終也歌者在笙者之上所以貴人
聲也此間歌之事也曰合樂三終工告樂備者謂堂上
堂下歌者笙者瑟磬一時並作也工歌關雎則笙吹鵲
巢以合之工歌葛覃則笙吹采芣以合之工歌卷耳則

笙吹采蘋以合之既畢而後工以樂備告之樂正此合樂之事也然則鄉飲酒禮所謂笙歌者不獨南陔六詩又有鵲巢采蘋采芣三詩矣使笙詩果無其辭豈其於笙入間歌之時則吹無辭之詩而於合樂之時獨吹鵲巢采蘋采芣有辭之詩耶彼夫授壺之有辟鼓魯鼓也特以方者繫鼓圓者繫鼈以示魯薛二鼓之音節而已今既列於雅而有詩矣又從而釋其義曰南陔白華言孝子也華黍言時和歲豐也由庚崇丘由儀言萬物也使

六詩者僅同於薛鼓魯鼓也彼序者豈皆無因而強爲之說哉先賢有言曰南陔廢則孝友缺矣白華廢則廉恥微矣華黍廢則蓄積缺矣由庚廢則陰陽失其道矣崇丘廢則萬物不遂其性矣由儀廢則萬物失其道矣甚矣六詩之有關於世道如此其重也今夫狸首者諸侯之射節也而投壺之禮亦云工歌狸首則狸首非夫子所刪明矣自諸侯競僭竊虞不獨狸首之詩亡并其義而亡之矣鄭玄曰燕禮之詩升歌鹿鳴下管新宮新

宮亦詩也然其辭與序今皆亡之由此以觀詩自春秋以來迄於暴秦不獨篇章散亂無紀卽一古序而殘闕遺亡如狸首新宮者寧可勝道而南陔六詩既亡之後猶幸存古序遺義於灰燼之餘乃欲憑後人之臆見疑而去之此吾所未服也

中興變雅論

宣王中興之主也六月雲漢諸篇詩人笑中興之辭也然小雅鹿鳴以下之樂廢於厲王而變於宣王夫變雅何以始於宣王也所謂變者謂小雅已廢有六月諸詩則小雅廢而復興矣然其廢也適在宣王之先故不曰正而曰變也大雅文王以下之樂變於厲王而仍變於宣王夫變雅何以仍於宣王也所謂變者謂大雅已亡有雲漢諸詩則大雅亡而再存矣然其存也亦無復文

王也盛故亦不曰正而曰變也且夫中興小雅首紀六月者武功成也中興大雅首紀雲漢者民事重也武功成矣姜戎遂逞卒喪南國之旅民事重矣千畝不藉空料大原之民是其於治天下也猶暴暄而含冰壓書而右息之前者熱其衣而後者去其薪功將日墮而事將日壞欲望其變而復歸於正豈可得哉

詩觸卷三

禾川水田居士賀貽孫子翼父著

小雅

呦呦鹿鳴食野之苹我有嘉賓鼓瑟吹笙吹笙鼓簧承
筐是將人之好我示我周行呦呦鹿鳴食野之蒿我有
嘉賓德音孔昭視民不忮君子是則是倣我有旨酒嘉
賓式燕以敖呦呦鹿鳴食野之苓我有嘉賓鼓瑟鼓琴
鼓瑟鼓琴和樂且湛我有旨酒以燕樂嘉賓之心

序曰鹿鳴燕羣臣嘉賓也○鹿仙獸善決驪羣居則環其角外向以防害己者性愛其類欲食皆鳴相召志不忘也鹿樂也常自能樂性從其雲泉至六十年必懷瓊於角下角有斑痕紫色如點行或有涎出口不能復急走矣陸佃曰鹿戴玉而角斑魚懷珠而鱗紫有諸內者形諸外也革今名賴蒿又曰賴蕭青色白莖如筋始生香可食又可蒸食獨陸佃以革爲萍謂藻也則革爲水上浮萍矣陸蓋從毛傳也姑存以備考鹿得革呦呦然相呼懇誠之至瑟爲堂上之樂笙爲堂下之樂笙以匏爲之十三管列匏中簧笙中金葉吹笙則鼓動其簧而發聲蒿青蒿也本草註云春生苗葉秋開淡黃花結子如粟米大荆楚人謂蒿爲菰荈莖如鈹股葉如竹蔓陸璣謂生澤中下地鹹處註云燕饗者燕在寢饗在廟饗者烹大牢以飲賓禮之大者獻數如其命數饗則君親獻燕則君不親獻也○飲食樂幣此好德無已之誠也雖嘉賓不以

飲食樂幣而始好我而我之心以為非此莫將也有
飲食樂幣以將之而其心猶恐飲食樂幣不足以將
之所謂無己之誠也懷此無己之誠庶幾嘉賓其好
我乎何以好我示我周行是已式燕以教燕樂其心
是已燕樂在示我周行之後其言愈淺其意愈深○
乞言特示我周行之一事然既曰嘉賓不獨示人以
言而已典型在望亦周行也下文視民不佻君子是
則是倣亦所以示我周行也註引禮記曰私惠不歸
德君子不自留焉蓋言人君以私意為惠而不歸本
於德則君子不肯自留今其飲食樂幣無己者惟在
示以周行此嘉賓所以樂告以誠也若必待燕享而
始乞言待醉飽而始贈人以言平日之訐謨安在哉
德音孔昭三句此賓之所以為嘉賓也視民不佻二
句則又德音所以孔昭者民風厚薄關係在此一人
嘉賓安得不重哉君子同有生民之責者也君子是
則是倣則又不獨民矣式燕以教謂嘉賓借旨酒以

游衍也湛謂和樂而永也燕樂嘉賓之心不必深看如云旨酒豈足為敬特借以歡娛其心而已歸所以形容好德之誠也時解君臣一心天地交泰等語腐甚杯酒通天地之泰談何容易哉大抵詩人之語深求反淺淺看自深

四牡騤騤周道倭遲豈不懷歸王事靡盬我心傷悲四牡騤騤嘽嘽駘馬豈不懷歸王事靡盬不遑啟處翩翩者騅載飛載下集于苞栩王事靡盬不遑將父翩翩者騅載飛載止集于苞杞王事靡盬不遑將母駕彼四駘載驟駸駸豈不懷歸是用作歌將母來諗

序曰四牡勞使臣之來也○駘馬最耐勞苦爾雅曰

白馬黑鬣曰駱廣雅曰黃馬黑鬣曰駱蓋馬無分黃
白取其尾鬣一道或朱或黃如界者若今衣脊絡縫
故曰駱也駱壹宿之鳥釋雅云鵠鵠也壹宿壹於所
宿之木也其性慈孝慈謹一曰鵠鵠一曰楚鵠註云
勃鳩又云夫不也夫不爾雅作鵠鵠音浮杞枸杞
也本草云名仙人杖根名地骨嚴華谷曰詩有三杞
將仲子兮樹杞柳屬也南山有杞湛露杞棘山木也
此詩苞杞四月杞榱北山言采其杞枸杞也註云啟
處跪居也蓋古者席地跪而後起跪而後坐坐者雙
膝着地而坐居即坐也大意謂不遑居處耳○此詩
與鵠羽篇同意但鵠羽出於行役者之口則為哀怨
此出於勞使臣之言則為體恤耳惟其體恤故能周
知其痛苦而代之言曰豈不懷歸又曰王事靡盬忠
孝備恩義兼矣忠不忘孝義不掩恩故懷之而至於
傷悲也次章啟處且不遑况歸乎既曰懷歸又曰不
遑啟處奉公既誠則歸亦付之空懷也翩翩者騅云

句代爲傷悲之語雖猶得止豈子獨不能養乎不遑
將父不遑將母乃其所以傷悲也忠孝難全賢者所
憂人君能憂其所憂則其感之也至矣五章將母來
諗言母則父可知矣烏鳥之私臣子所不敢言而爲
君者曲爲悉之蓋聖人以孝治天下教孝乃以教忠
故代言豈不思歸作歌來告欲使君上知啣命之臣
有此苦情耳天下豈有無父之國哉以此來告安得
不聽其請乎蓋勞使臣者逆探其情而爲之辭云爾
皇皇者華于彼原隰駢駢征夫每懷靡及我馬維駒六
轡如濡載馳載驅周爰咨諏我馬維駒六轡如絲載馳
載驅周爰咨謀我馬維駉六轡沃若載馳載驅周爰咨
度我馬維駒六轡既均載馳載驅周爰咨詢

序曰皇華君遣使臣也。皇華毛傳云忠臣奉使能
光君命無遠無近如華不以高下易其色也。駟毛淺
黑而白兼雜毛者今名泥驄孔氏曰雜毛是體間有
三種之毛相雜也走馬曰馳策馬曰驅。每懷靡及
一句該全詩之意人君遣使臣必勉其無所不及而
入臣奉使常恐其有所不及有歉然有所不及之懷
則必裕然無所不及矣每懷者每事必懷不及是以
諷而謀謀而度度而詢四者兼而且周此則每懷靡
及之事也遣使臣而原其心如此既美之且以勵之
也懷者君體臣臣奉君之實也既畢使而勞之則曰
豈不懷歸甫出使而遣之則曰每懷靡及一以悉其
隱痛一以寫其虛懷。左傳叔孫穆子對晉行人子
員曰皇皇者華君教使臣必咨於周臣聞之訪於善
為咨咨事為諷咨難為謀咨禮為度咨親為詢臣獲
五善敢不重拜杜預註咨事謂咨問政事也咨禮問
禮之所宜也咨難咨事之難易也咨親咨於親戚也

常棣之華鄂不韡韡凡今之人莫如兄弟死喪之威兄
弟孔懷原隰哀矣兄弟求矣脊令在原兄弟急難每有
良朋況也永歎兄弟閱於牆外禦其務每有良朋烝也
無戎喪亂既平既安且寧雖有兄弟不如友生儼爾遙
豆飲酒之飫兄弟既具和樂且孺妻子好合如鼓瑟琴
兄弟既翕和樂且湛宜爾室家樂爾妻孥是究是圖豈
其然乎

序曰常棣燕兄弟也○常棣棣也子如櫻桃今郁李
也花鄂上承下覆相親也李氏曰何彼穠矣與論語

唐棟之華所謂移也此與采薇維常之華則棟也脊
令雪姑也鳴則天必大雪大如鷓鴣雀長脚長尾尖喙
背上青灰色腹下白頸上黑如連錢杜陽人呼為連
錢又名雛渠脊令水鳥而在原失其常處則飛則鳴
以求其類天性也猶兄弟之於急難或曰脊令飛則
悲鳴行則首尾相應亦手足相救護之意○全詩大
意在凡今之人莫如兄弟二句以言既言死喪又言
急難又言外侮大小變故皆從艱難中推勘人情描
寫世態以見莫如兄弟之故蓋同父之人平時則蒙
陳易生變故則舐望易起故往往寬於疎逖而刻於
骨肉一旦有事朋友惟聞浩嘆妻子但見悲泣惟
兄弟為我國維及至時平事過尚追咎其棟之不早
圖之不力即血誠已竭亦謂分所宜然安樂重見蒙
陳又生飲食牀簣之間皆足以生凌生怨舉向者孔
懷急難禦侮種種至情頓忘之矣惟思及變故之時
死喪莫如兄弟急難莫如兄弟禦侮莫如兄弟又思

及安樂之時酒食朋友莫如兄弟妻子好合莫如兄弟展轉反覆舉莫如兄弟之言究之圖之然乎否乎層層換醒字字欲泣。凡今之人不獨外人也下艾朋友妻子皆包在內。○死喪變之大者原隰哀矣兄弟求矣二句又舉孔懷之大者言之孔懷從威字看出便深死喪之威人所畏惡也威而懷之自非骨肉不能二矣字跌宕生情。○急難謂救難也左傳所謂急病讓夷也永歎謂愛莫能助也急難之事即良朋有氣誼者尚付之浩嘆勢利之交可知矣。○開牆非兄弟之良也及至外侮之來則舍小忿而爭大義矣若朋友雖良豈能助我興戎乎妙在將良朋二字擡高朋友一層將開牆一事放低兄弟一層又妙將死喪大故漸說到患難又漸說到外侮他人由淺入深語愈深而意反淺此由深入淺語愈淺而意愈深。○國語富辰曰古人有言曰兄弟讒閱侮人百里謂兄弟縱以讒言相關而外侮之人猶避我於百里也此

與此詩同意每見桀鵲不遜之輩而開牆禦侮往往有之不獨友愛者為然○五章喪亂總承上三章而言不如莫如暗相呼應小人樂從所陳而以親為怨類如此刻畫入微○六章孺子妙即孟子所謂孺慕檀弓所謂孺子泣也籩豆陳而飲酒飯亦既可樂矣然何如兄弟畢集而其和樂如孺子乎○七章言妻子好合八章言樂爾妻孥安顏兄弟既翕於中間詩情最妙蓋人情各私其妻子自非賢者鮮不為枉席所移故教以和樂且湛欲其永有此室家之樂也湛永也常人以前之樂為樂故但私其妻子而已古今管蔡之流徒以兄弟不和至自敗其室家妻子者無論矣即使尋常開張相怨一方試當滿堂歌舞家人懽笑之時偶一念及能無動心為樂未畢嘆嘆隨之矣君子之樂從其久遠言之故必妻子合而兄弟又翕然後和樂可永而室家可宜妻孥可樂也是究是圖二語欲其熟思而遠慮之耳○左傳富辰諫襄

王曰昔周公弔二叔之不成故封建親戚以藩屏周
召穆公思周德之不類故糾合諸侯於成周而作詩
曰常棣之華杜預云周公作詩召公歌之也

伐木丁丁鳥鳴嚶嚶出自幽谷遷于喬木嚶其鳴矣求
其友聲相彼鳥矣猶求友聲矧伊人矣不求友生神之
聽之終和且平伐木許許醺酒有藇既有肥羜以速諸
父寧適不來微我弗顧於粢酒埽陳饋八簋既有肥牡
以速諸舅寧適不來微我有咎伐木于阪醺酒有衍籩
豆有踐兄弟無遠民之失德乾餱以愆有酒湑我無酒

酤我坎坎鼓我蹲蹲舞我迨我暇矣飲此滑矣

序曰伐木燕朋友故舊也。五月羔為羜劉氏曰簋八則蓬豆倍之天子燕禮之數也今人謂乾飯為饌毛云滑茜也音縮即上文醢酒意謂以茅裹之而去其糟也以筐曰醢以數曰滑。此上下通用之樂章不必專言天子蓋自天子以下至於庶人無不藉友以成者言友而先以鳥言鳥而先以伐木言鳥聲而先以出谷遷喬妙有波折嚶嚶衆鳥聲也出遷二字着在鳥上巧而不纖鳥曰友聲奇矣求友聲尤奇求聲在嚶鳴看出觀物甚微求謂志氣相感也神之聽之言其誠而壹也求友生者其和好如嚶鳴之鳥則誠而壹矣誠而壹者鬼神聽之亦鑒其和平况於友生乎時解謂鬼神錫以和平之福則天下泰和方隅砥平腐甚可厭。二章許許衆人作力之聲蓋舉重邪許非一人所作以興君子之德必藉衆友而成也酒

食非所以求朋友然非此無以將其誠所謂中心好之曷飲食之是也寧適不來微我弗顧躬自厚而薄責於友也蓋朋友之疎常生於互相責望我盡其厚而不以望人此交道所以長也微我有咎亦即此意諸父諸舅尊者之稱註云諸父朋友之同姓而尊者諸舅朋友之異姓而尊者是也時解謂天子稱同姓曰諸父異姓曰諸舅豈諸侯以下遂無朋友無父舅乎八簋亦但言其盛非必獨舉天子八簋言之也○三章阪木所生之地也伐木者必於衆木求之猶取友者必於衆友求之也兄弟朋友之同類者無遠二字親洽之極遠不必我疎之也情意稍睽即遠矣民之失德乾餼以愆如羊斟不及而華元囚龜羹不分而靈公弑之類亦是一種在朋友中豈必有此人然君子於友必防其漸故作事謀始勿以小者示隙則其大者又可知也况乾餼未具我實不德彼何責焉穆生以醴酒去楚子思以鼎肉去微豈必失德之民

哉是以君子之於朋友故舊不以有無為辭也有則
我清之無則我酤之又且我鼓我舞以樂之倘獲餘
閒尊酒共酌不限以期不拘以數即此六句但有氣
誼更無形骸區區勢分不足言矣清我以下四我字
倒用
妙甚

天保定爾亦孔之固俾爾單厚何福不除俾爾多益以
莫不庶天保定爾俾爾戩穀罄無不宜受天百祿降爾
遐福維日不足天保定爾以莫不興如山如阜如岡如
陵如川之方至以莫不增吉蠲為饔是用孝享禴祠烝
嘗于公先王君曰卜爾萬壽無疆神之弔矣詒爾多福

民之質矣日用飲食羣黎百姓徧為爾德如月之恒如日之升如南山之壽不騫不崩如松柏之茂無不爾或

承

序曰天保下報上也。爾雅曰山脊曰岡大旱曰陵蓋岡為山之大者陵為旱之大者炊黍稷曰饁自殷以上曰春禴夏禘秋嘗冬烝周去夏禘而以春禴當之更名春曰祠春祠猶食也夏禴新菜可禴秋嘗當新穀也冬烝進品物也劉須溪曰禴祠烝嘗各倒一字此音節也恒弦也每月六日九日月體半昏而中似弓之張而弦直謂之上弦上弦則漸滿矣不言望者貴將來也承謂新舊相接也松柏之葉非不凋也但舊葉方落新葉又生故曰承。○註云吉為諏日擇士諏日者諏謀祭日而卜其吉凶也擇士者大射以

擇與祭之士也。獨為齋戒滌濯三日齋七日戒致潔於內也。滌濯致潔於外也。○凡下報上之詞犬馬之誠不敢以上加君父必稱天以祝者敬之至也。稱天又稱神者忠愛無已之情也。既祝福矣又祝其德曰俾爾戩穀曰偏為爾德頌不忘規與容悅者異也。篇中九如字前後相疊祝之不足又再祝之出沒錯綜此詩人用筆之妙也。○首章為天所保定此福之所由生也。俾爾以下則天之所以保定者俾爾單厚何福不厚俾爾多益何福不益除猶新也。庶猶多也。新與新積故厚多與多積故益各下句皆所以足上句也。○二章戩穀罄宜皆福也。天福吾君必使吾君每事盡善而凡所為者無不合宜斯可以受天百祿矣。福一也在天為祿在人為福在天為降在人為受我能有以受福福可遐矣。惟日不足未艾之福也。日豈有不足哉。然以未艾之福視之雖日降以福猶若不足所云受者已倦施尚未厭也。輔慶源曰罄無不宜

受天百祿已然之事降爾遐福惟日不足方來之事也○三章莫不興承上二章言之也岡陵乃山阜之大者始僅山阜繼則岡陵矣此即下文所謂增也言山則山阜岡陵文經四變而言川則一方字括之川之方至滔滔為江河而不可涯涘寧僅川而已哉句法詳畧伸縮俱妙以莫不增言其福無量猶前章所謂惟日不足也○四章言福而本之孝享蓋孝享者致福之由也君曰二句尸傳先公先王之辭君猶先公也人君之福莫大於壽故此章以壽為福○五章以祭祀致福而廣言之天子以天下為福則羣黎百姓無非天子一人之福羣黎百姓之福日用飲食是也此二句寫大平景象在一質字日用飲食所謂質也百姓無德以安其日用飲食為德上之所以為德者不過使民安其日用飲食而已下之所以徧為德德者不過各安其日用飲食而已日用飲食日與德化不知誰之所為而曰爾德者無所歸德歸之天子

詩人頌美之詞也蓋惟帶力何有則莫非帝力矣惟
不識不知則莫非爾極矣末季之民機詐橫生德日
偷矣欲享其日用飲食之福豈可得乎○六章四如
字與第三章五如字相隔相應章法甚妙若在今人
便以一氣為波瀾矣月言其恒不言其盈日言其升
不言其中南山不言其高第言其不騫不崩松柏不
言其喬第言其茂立言之意自深或字亦妙或者不
知誰何但見有時而承而已

采薇采薇薇亦作止曰歸曰歸歲亦莫止靡室靡家玃
狁之故不遑啟居玃狁之故采薇薇采薇薇亦柔止曰歸
曰歸心亦憂止憂心烈烈載饑載渴我戍未定靡使歸
聘采薇薇采薇薇亦剛止曰歸曰歸歲亦陽止王事靡盬

不遑啟處憂心孔疚我行不來彼爾維何維常之華彼
路斯何君子之車戎車既駕四牡業業豈敢定居一月
三捷駕彼四牡四牡騤騤君子所依小人所腓四牡翼翼
象弭魚服豈不日戒獫狁孔棘昔我往矣楊柳依依
今我來思雨雪霏霏行道遲遲載渴載饑我心傷悲莫
知我哀

序曰采薇遣戍役也○薇作謂芽新出土也柔則生
矣剛則長矣時之變也十月嫻於無陽故曰陽月或
曰盛暑非無陰故四月靡草死秀萋生極寒非無陽
故十月薺麥生特以微陽始胎故曰陽月啟居猶啟

處啟疏也象弭以象骨飾弭左傳左執鞭弭曲禮云
右手執簫簫弭頭即受弦處以象骨飾之則弦之上
下不齟齬也魚服以海魚皮為弓衣也路車之制革
鞅而漆色上建大白龍勒而脰纓天子諸侯之車方
稱路車將帥當駕戎車亦稱路者必將帥之命數如
諸侯也按車制對敵有革車馳敵有輕車橫陳有廣
車負重有輜車古者戎役兩期而還故薇作是今歲
之春暮止則來歲之仲冬正兩期之時也陽止亦次
年之十月也獮狁北狄即商之獯鬻漢之匈奴也北
狄畏暑耐寒又秋氣折膠弓弩可用秋冬曷以犯邊
故留屯以防之宋人曰防秋是也○王者能恤民之
勞則人忘其勞矣故於其遣戍役也必有辭以恤之
常初遣之日而首言曰歸末言曰來思者所以慰其
心也遣戍役而不及將帥者王者不得已用兵之意
將在幃幄知之而兵不知且疆場之事功歸主將而
勞在戍役故但言戍役也前三章歷叙出戍之事四

五章預言在戍之事末章則預言歸戍之事其言公義而本之私情則章章有之○首章薇作是出戍之時歲暮則來歲歸時事也此皆代為軍士之言預指曰歸曰歸者其辭若憫其隔歲之久其意則示以兩期即還不違期也重言玁狁之故蓋自念其出戍之不得已則遣戍之不得已隱然在言外矣又代言其靡室靡家不遘啟居勤苦如此似恤之實勵之想見立言之妙○二章載饑載渴蓋急於公事道路之苦不暇計也戍畢則定矣今政在戍程限未滿更番未代寧有定乎靡所歸聘體恤最深遠行之人必訖平安所謂烽火三月家書萬金也今我戍未定則不暇使人歸聘矣公爾忘私之意可見○三章王事靡盬不遘啟處即首章不遘啟居玁狁之故意既以玁狁為王事則義無所逃矣言曰歸曰歸歲亦陽止則來矣又曰我行不來者蓋代為捐軀致死不肯生還之語嘉其義作其氣也○四章言遣戍而及於君子之

軍者三軍以主將為命也言戍守而及於一月三捷者善守由善戰乃固也一月三捷原非實事然在軍中不可無此快想此乃狀其不敢定居之心耳五章言車馬軍容之盛蓋以戎車者君子所依以備禦小人所隨以進止也腓隨也象弭魚服以車上器械言之前曰一月三捷矣此曰日戒曰孔棘者惟能日戒惟懷孔棘而後能一月三捷始為處女則其後為脫兔不難矣六章戍歸之苦一一自遣戍時悉之楊柳即采薇之時雨雪即莫止之時首尾暗相呼應昔之往也骨肉不見獨有楊柳依人可哀也今之來者長途重繭又值雨雪逗遛尤可哀也行道遲遲言其遠也歸心如駛雖離鄉已近愈覺其遠月道途勞苦莫甚於饑渴故載饑載渴在方去與既歸之時反覆言之饑渴細故尚且勤王者之憂況其他乎以王者代為戍役之言而曰莫知我哀則固已知之矣且當初遣之日而即預為莫知我哀之想則他人不知而王

者已深知之矣○鍾伯敬曰四十五章教之奮揚教之
戒懼此不是身家語然為身家計亦不出此

我出我車于彼牧矣自天子所謂我來矣召彼僕夫謂
之載矣王事多難維其棘矣我出我車于彼郊矣設此
旄矣建彼旄矣彼旃旄斯胡不旆旆憂心悄悄僕夫況
瘁王命南仲往城于方出車彭彭旂旄央央天子命我
城彼朔方赫赫南仲玁狁于襄昔我往矣黍稷方華今
我來思雨雪載塗王事多難不遑啟居豈不懷居畏此
簡書嘵嘵草蟲趯趯草蟲未見君子憂心忡忡既見君

子我心則降赫赫南仲薄伐西戎春日遑遑卉木萋萋
倉庚喈喈采繁祁祁執訊獲醜薄言還歸赫赫南仲玁
狁于夷

序曰出車勞還卒也。○都外有郊郊外有牧五十里
為近郊百里為遠郊。兵家先陽故取象鳥隼畫鳥隼
於旗示猛鷙也。兵家尚陰故取象龜蛇畫龜蛇於旄
示威武也。旄以制後旗以統前。所謂前朱雀而後玄
武玄武即龜蛇旄則旗旄皆有之。蓋前車在牧此云
出車在郊則為後軍。故所見者建旄設旄耳。蓋旗不
可見而但見旄。而所建之旄亦設旄也。旄謂以毛注
旗于之首也。彼旗旄斯則兼前後軍言之。交龍為旂
軍中左青龍而右白虎旂則所謂青龍也。若熊虎曰
旗是為白虎。經文偶畧耳。古無紙有事則書之於簡

此簡書則天子遣將之策命也。○勞還帥詩句句是大將舉止出師尚嚴讀首三章便凜如秋霜凱歸貴和讀後三章便藹如春露如見北風圖遍體皆寒及見雲漢圖遍體忽煖且其間有整有暇有勤有慎有威有斷我出我車責任專也。自天子所寵命渥也。憂心悄悄臨事懼也。執訊獲醜恩威著也。全是專閫氣象一字移向采薇扶杜不得所以為妙。○首章遣將時事也。前四句想見卸命握符雍容鄭重已非偏裨規模矣。命彼僕夫以下號令嚴肅便有君言不宿於家之意。○二章前六句想見軍容之盛然其運籌決勝智深勇沉全在憂心悄悄二句蓋悄悄乃所以為赫赫而有今日之憂乃所以有旋歸之樂也。僕夫況瘁蓋以主將之憂為憂者。○三章在憂心悄悄戒懼之後不可無此一奮奮揚曰天子命我重其事也。蓋訓厲士卒必藉一人之靈爽為之鼓動赫赫在南冲而於襄在獵猷猷名所殲已令狄人氣奪後來執訊

獲醜之功在此張本。○四章黍稷方華王荊公以為
季夏時而雨雪載塗則春凍始釋時蓋凍釋則為泥
塗且煦下文春日遲遲言之耳豈不懷歸追述朱歸
時情事凡此皆代為將帥之言既著其功又慰其勞
又恤其私也。○五章復代為室家感懷之語蓋其體
悉慰勞也至矣薄伐西戎蓋室家想望無聊遙擬之
詞若謂南仲何不歸乎或者以彼赫赫威名既成北
征之功復啣西伐之命耳此雖詩家冷趣却似代為
南仲增聲價妙甚六章因北歸而舉春日數語點綴
生色甚有閒趣室家方思而南仲忽至此景如畫旋
歸於執訊獲醜之日功在異域而身在故鄉其樂可
知前曰於襄著其城守彈壓之望此曰於夷著其凱
還底定之勲篇中凡三言赫赫南仲天子不自有其
功名而歸於大將此則其所以能將將也

有杖之杜有皖其實王事靡盬繼嗣我日日月陽止女

心傷止征夫遑止有杖之杜其葉萋萋王事靡盬我心
傷悲卉木萋止女心悲止征夫歸止陟彼北山言采其
杞王事靡盬憂我父母檀車憚憚四牡瘡瘡征夫不遑
匪載匪來憂心孔疚期逝不至而多為恤卜筮偕止會
言近止征夫適止

序曰杖杜勞還役也○將帥所喜者功名故出車之
詩著其功而兼言其情軍士所恤者妻子故杖杜之
詩但述其室家之懷而已始去則遙望其歸故采薇
之遣役也必預言其日歸之期與懷歸之事既歸則
追憫其去故杖杜之勞還也但述其未至之思而已
蓋舉人情之最篤至者為體悉也使此詩出於室家

所自作則與雄雉告子於役諸篇同一哀怨矣惟下
之人不言而上之人曲盡其情代為言之彼見九重
之上不獨憫我勤勞且能念我家室即令我家室自
陳其痛苦不過如是愷切也夫是以感激奮勵樂為
之死而不辭矣故曰君子能通天下之志也篇中妙
在以物紀時杜阮實秋冬之間也故曰日月陽止
謂十月也杜葉萋萋仲春二月也采芣則春莫三月
也且其描寫事情恹恹無聊忽擬其暇忽望其歸忽
訝其不歸忽料其將歸忽遙想其車馬忽祈請於卜
筮思而憂憂而復望望而疑疑而忽信兩年苦境一
時逼露唐人閨思詩所不及也○首章以杜阮實
為陽月戌畢之期而冀其暇也杜孤特所以興征
夫之無依也繼嗣我日猶言日復一日造語工妙本
之王事靡盬者見民情向義雖婦人亦知有王事不
以情掩義也遑止二字亦有味謂縱不得歸豈至此
猶不暇乎暇者將歸之漸也○二章戌畢交代當以

仲春抵家故以杖杜萋萋起興萋萋謂實落而葉又
生也卉木萋萋則百草皆春不止一杜蓋感傷愈深
矣歸止謂此時可以歸也○三章采杞則春暮過期
矣曰憂我父母則又不止於室家之情矣鴉羽篇王
事靡盬父母何怙方且大聲疾呼而上若罔聞此不
待自言而代為歌咏之所謂體悉之至也車瘳瘳而
敝馬瘡瘡而罷若見其將至矣故曰不遠不遠者望
之之辭也○四章因過期不歸故以不裝不來為疚
期逝猶過期也而多為恤王荊公云饑渴歟疾病歟
死傷歟是何期逝而不至也極似閨中猜疑語氣且
得多恤二字神情然總勿與呆人說呆人指定此三
者講去有三者可指則不多矣惟其多恤故決之卜
筮也凡事卜筮不相襲今日階止蓋闔思無聊求之
龜又求之筮婦人常態也會言近止蓋權以卜筮之
言為喜所謂鵲雀燈爆望梅解渴亦無聊之情也適
止將至而未至之辭但前曰不遠猶在疑信之間今

曰通止則信矣篇中到底不言及歸家之喜蓋言喜則思淺言思則喜深喜在思後故深也

南陔

詳論

序曰孝子相戒以養也

白華

序曰白華孝子之潔白也

華黍

序曰華黍時和歲豐宜黍稷也

續序云有其義而亡其辭

魚麗于罍鱠鱠君子有酒旨且多魚麗于罍鮐鱧鱧君子有酒旨且有物其多

矣維其嘉矣物其旨矣維其偕矣物其有矣維其時矣

厚曰魚麗萬物咸多能備禮也○留註云以曲簿為
筍而承梁之空毛謂曲梁也寡婦之筍以其用功寡
而待魚之自至也鱮毛云揚也稗雅云以其性浮而
善飛躍故曰揚也燕首魚身頰骨正黃魚之有力而
能飛者一名黃頰魚一名黃揚鯊鮫也今吹沙小魚
性善沈大如指狹圓而長有黑點文常沙中行一名
吹沙或曰鯊魚多種有極大者其皮如沙今人以為
刀劍鞘吹沙則小魚耳鱧稗雅云玄鱧也其首戴星
夜則北向有花文一名文魚與蛇通氣諸魚中惟此
膽甘可食梅誕生云一名鯛圓長斑點有七道家忌
之以其戴斗也註云鮠也但考鱣魚一名鮠今鱧亦
曰鮠未知孰是鮠鮠也無鱗多涎即鮠魚也稗雅云
鱮魚黃鮠魚青鱧魚玄鮠魚白鯉魚赤五色之魚備
矣此詩鱮魚之味不如鮠鱧鮠鱧之味不如鮠鯉則

其序也。○曰旨曰有曰多則燕之盛可知矣。此詩特以後三章衍前三章耳。無二意也。君子工歌言主人也。言酒則穀隨之前三章曰酒蕝辭也。言物則穀與酒皆備矣。

由庚

序曰萬物得由其道也

南有嘉魚烝然罩罩君子有酒嘉賓式燕以衍南有樛木甘飴魚烝然汕汕君子有酒嘉賓式燕以衍南有樛木甘飴烝之君子有酒嘉賓式燕綏之翩翩者騅烝然來思君子有酒嘉賓式燕又思

序曰樂與賢也。○嘉魚鯉質鱗鱗肉美食乳泉出於

丙穴其穴在漢中沔南縣北穴口丙向故曰丙也罾
簞也以荆為之故名楚簞或以竹為之捕魚籠也
鄭箋曰今之撿罾也爾雅曰罾也註曰櫟也音嘲與
罾通用陸佃曰嘉魚欲逸則罾之使入嘉魚欲伏則
汕之使出求賢之道如此而已鮑有苦有甘其甘者
可食○此詩蓋好賢之至樂與飲宴故言之不已又
屢言之曰樂曰衍曰綏曰又皆我樂之之詞也樂稱
未已而又安之一燕未已而又燕之極言其樂與之
誠也首二章以取魚之盡道與燕賢之盡誠三章以
木之下垂而引鰲與與賢者之極誠而賢安四章以
離之飛而復來與燕之畢而復舉所謂中心好之曷
飲食之也

崇丘

序曰崇丘萬物得極其高大也

南山有臺北山有萊樂只君子邦家之基樂只君子萬
壽無期南山有桑北山有楊樂只君子邦家之光樂只
君子萬壽無疆南山有杞北山有李樂只君子民之父
母樂只君子德音不已南山有栲北山有杻樂只君子
遐不眉壽樂只君子德音是茂南山有栲北山有桤樂
只君子遐不黃耇樂只君子保艾爾後

序曰南山有臺樂得賢也。臺一名夫須即莎草也
可以為筮又可為簞萊草名葉香可蒸為茹南人謂
之萊蒸杞山木而滑似櫟枸枳枸也其子味如蜜長
數寸大如指俗謂癩漢指頭一名木蜜能解酒毒以

其本作屋則屋中之酒皆薄人家左右有此樹則醴酒不成挾鼠梓也亦名苦楸樹葉木理如楸醫書以眉毛過垂眼下者為壽長孔氏曰老人髮白復黃面如凍梨之色故曰黃耆○枸音舉與枸杞之枸不同○全詩或先德後壽或先壽後德或專言德或專言壽或言德而壽之意已兼或言壽而德之意亦寓錯綜變換自有踈落之致○國家有賢如山之有草木以自覆蓋故以南山北山起興德音不已德亦壽也保艾爾後壽亦德也古人萬壽無疆不但以祝君如士冠祝辭曰眉壽萬年之類也保安艾養蓋欲保艾其後來之壽也大全輔氏獨以為保艾後世之子孫則又不但及身而止也亦自有味

由儀

序曰由儀萬物之生各得其宜也

蓼彼蕭斯零露漙漙兮既見君子我心寫兮燕笑語兮是
以有譽處兮蓼彼蕭斯零露瀼瀼既見君子為龍為光
其德不爽壽考不忘蓼彼蕭斯零露泥泥既見君子孔
燕豈弟宜兄宜弟令德壽豈蓼彼蕭斯零露濃濃既見
君子偉革沖沖和鸞雖雖萬福攸同

序曰蓼蕭澤及四海也。蕭荻也香蒿也。偉革以飾
馬和鸞以飾車。偉轡也革馬轡所把之外有餘而垂
者沖沖垂也以皮為之故曰偉革和金口木舌鸞金
口金舌和在轡鸞在衡轡車上橫板手所憑者衡車
前橫木駕馬者所謂軓也升車則馬動而鸞鳴和應
矣。稗雅曰鸞雌曰和雄曰鸞。○此詩序云澤及四海

朱註云天子燕諸侯之詩蓋諸侯朝於天子天子燕之四海內外五等之爵無不在也言四海者舉其遠而近者可知也天子能慈惠諸侯則天下安故曰澤及四海也鄭箋專舉遠方諸侯九夷八狄七戎六蠻為澤及四海失序意矣○朝會燕享天子諸侯維繫聯屬之義於是乎在天子樂其笑語之誠而諸侯亦勤其服事之忱是以上下盤結無貳無虞此周初所以太一統也後世子孫曰驕曰偷其始也天子大尊而簾遠於堂其既也天子漸卑而枝大於幹矣故蓼蕭廢者天子下堂而見諸侯之漸也天子下堂者諸侯不朝之漸也夫豈一朝一夕之故哉○詩中神情全在各章既見君子四字一種欵洽俱從既見後想出我心寫兮一寫字極狀傾倒之誠方來朝之初體統尊嚴豈容假借朝罷而燕則降色以後於是有笑語矣笑語而本於我心之寫推誠之至也是以字有字亦有意君臣相歡是以有其聲馨和樂一或有閒

雖欲保其譽處豈可得乎警勸諸侯之意悠然言外
矣○誦我心寫今燕笑語今二句大平天子和藹氣
象恍然如遊春日方知唐人以九天闔闔萬國衣冠
等語描寫大平終是鋪張聲口耳○龍光二字離合
言之奇甚諸侯承天子之澤以澤一方是猶龍也光
者陽也龍德之著於外也龍陽物也陽氣澤物為見
故易曰見龍見者陽之光也王子安勝王閭記亦用
龍光語毛朱皆以龍字代龍字失其解矣諸侯為龍
為光則其德不爽矣故以壽考祝之祝其長也天子
之龍光也不忘猶言不已壽本之德做勸之意亦在
言外○孔燕豈弟猶言大哉燕飲之時如此乎其豈
弟也於其燕飲之豈弟則知其有宜兄宜弟之令德
矣有宜兄宜弟之令德則知其可以獲壽豈矣豈樂
也諸侯之樂莫大於壽故曰壽豈註云諸侯繼世而
立多疑忌其兄弟此語最有關係斗粟尺帛自相剪
滅欲保其令德壽豈其可得乎讚美之中箴戒及也

可謂大哉王言矣。○沖沖雖離卽德也。德不可見於其沖沖雖離者想像之而已。曰萬福則不止於壽而壽亦在其中矣。全詩皆以蕭露起興。蓋取香草以喻諸侯之德。而以零露之降自天者喻天子之寵也。

湛湛露斯匪陽不晞。厭厭夜飲不醉無歸。湛湛露斯在彼豐草。厭厭夜飲在宗載考。湛湛露斯在彼杞棘。顯允君子莫不令儀。

序曰湛露天子燕諸侯也。○按燕禮君曰無不醉賓及卿大夫皆對曰諾敢不醉。所謂敢不醉者猶孟子所云不敢不飽也。天子而懷無不醉之樂歡於笑語之燕矣。故首二章曰不醉無歸。在宗載考諸侯而凜

不敢不醉之命嚴於監史之設矣故下二章曰莫不
令德莫不令儀此所謂禮飲也○厭厭毛云安也註
中又添又足二意透甚又足二意在不醉無歸內見
之蓋不醉無歸乃所以申厭字之義耳露必日始晞
飲必醉始歸興而比也燕必以晝而曰夜飲者以燕
禮又有宵則設燭之儀所以曲致其勤也夜飲必於
宗室親之也考訓成謂成禮也鄭云讀則不成不許
其讓故曰成也陳敬仲飲桓公酒而樂公曰以火繼
之辭曰臣卜其晝未卜其夜於是乃止是不成也湛
湛之露杞有之棘有之離離之實桐有之梓有之此
來朝之諸侯莫不令德令儀之喻也醉可以觀德言
令德令儀於不醉無歸之後其意自深

彤弓 彤弓受言藏之我有嘉賓中心貺之鐘鼓既設

朝饗之彤弓 彤弓受言載之我有嘉賓中心喜之鐘鼓

既設一朝右之彤弓昭兮受言櫜之我有嘉賓中心好
之鐘鼓既設一朝疇之

序曰彤弓天子錫有功諸侯也。○古者賜弓矢而後
征伐左傳甯武子曰諸侯敵王所愾而獻其功於是
乎賜之彤弓一彤矢百茲弓矢千按彤弓色赤茲弓
色黑周人尚赤故赤一而黑十賜弓不張故曰昭昭
謂弛而體反也載抗也謂抗之於弓櫜使其體常正
也櫜韜也謂韜之于弓囊使其色常新也皆所謂藏
也凡賜弓矢以饗禮行之饗烹大牢設几而不倚爵
盈而不飲獻如命數其禮重於燕古人以右為尊故
曰右主人酌賓曰獻賓飲主人曰酢獻酢之外主人
又酌賓曰疇。○呂東萊云受言藏之言其重也中心
祝之言其誠也一朝饗之言其速也三句最有味重
則不褻不濫故其得之者不敢以為輕矣誠則不疑

不忌故其被之者不敢以為私矣。速則不惜不吝，故其受之者不敢以為緩矣。此人主賞功之道而亦馭世之法也。○凡賜出於不得已者，非中心貺之也。曰：中心貺之，不獨見天子有道樂易無虞，亦見朝廷有權操縱在我也。

菁菁者莪在彼中阿，既見君子樂且有儀。菁菁者莪在彼中沚，既見君子我心則喜。菁菁者莪在彼中陵，既見君子錫我百朋。汎汎楊舟，載沉載浮。既見君子，我心則休。

序曰：菁莪，樂育才也。○莪，一名蘿蒿，葉如青蒿，科生可食，生澤國漸洳之地，草初生而玄盛，則青。詩曰：何

草不玄言其初生何草不黃言其死菁菁者莪言其
 盛也貝二為朋百朋者言多也貝肉如科斗而有齒
 尾以其背用故稱貝孔氏曰貝有五大貝小貝牡貝
 么貝不成貝是也然相貝經又有紫貝珠貝霞貝綬
 貝之類則貝之名非一而足也○此詩序曰樂育才
 而註謂燕飲賓客但詩中並無燕飲語或者燕賓客
 時所歌而實則育才之詩也○言國家之育才如大
 陵之育莪菁菁其盛也既見君子毛以君子為人君
 朱以君子為賢者但序云樂育才蓋言上之人以育
 才為樂則樂且有儀當屬人君而君子則賢者也君
 子成才之稱育才而成則君子矣故既見而樂之又
 且有禮以相接也錫我百朋我君也人君樂得賢才
 如錫我以重貨也當其未得賢也如楊舟之浮沉而
 靡所止及其既得而見則育才之願畢矣故休休然
 而安也凡此皆所以為育才也故南有嘉魚曰樂與賢
 南山有臺曰樂得賢此曰樂育才育才猶言長養賢

才也

六月棲棲戎車既飭四牡騤騤載是常服玁狁孔熾我
是用惡王于出征以匡王國比物四驪閑之維則維此
六月既成我服我服既成于三十里王于出征以佐天
子四牡修廣其大有顓薄伐玁狁以奏膚公有嚴有翼
共武之服共武之服以定王國玁狁匪茹整居焦獲優
鎬及方至于涇陽織文鳥章白旆央央元戎十乘以先
啟行戎車既安如輕如軒四牡既佶既佶且閑薄伐玁

我至于大原文武吉甫萬邦為憲吉甫燕喜既多受祉
來歸自鎬我行永久飲御諸友魚鼈膾鯉侯誰在矣張
仲孝友

序曰六月宣王北伐也○續序云鹿鳴廢則和樂缺
矣四牡廢則君臣缺矣皇華廢則君臣缺矣常棣廢
則兄弟缺矣伐木廢則朋友缺矣天保廢則福祿缺
矣采芣廢則征伐缺矣出車廢則功力缺矣杕杜廢
則師眾缺矣魚麗廢則法度缺矣南陔廢則孝友缺
矣白華廢則廉恥缺矣華黍廢則蓄積缺矣由庚廢
則陰陽失其道理矣南有嘉魚廢則賢者不安下不
得其所矣崇丘廢則萬物不遂矣南山有臺廢則為
國之基墜矣由儀廢則萬物失其道理矣蓼蕭廢則
恩澤乖矣湛露廢則萬國離矣彤弓廢則諸夏衰矣

菁莪廢則無禮儀矣。小雅盡廢則四夷交侵中國微矣。○按續序紀小雅廢于六月之下者蓋言有六月之詩而後宣王中興小雅可復也。凡諸續序義隘而偏辭澁而拙殊不似先秦人語。獨此序與東山篇續語則辭義俱達若皆如此卽以爲子夏所作誰敢疑之。大約續序非盡無其本因漢之講師謬爲附益遂真偽混淆耳。○戎車有五周禮車僕掌戎路廣車關車革車輕車是也。戎路王在軍所乘廣車橫陳之車開車補闕之車革猶屏也。對敵自隱蔽之車輕車馳敵致師之車也。常服戎事之常服周禮兵事常弁服凡皮去毛曰韎韎韎者赤色也。凡衣同冠色衣韎韎則弁亦韎韎也。織文鳥章旗幟之文而畫鳥隼之章鳥章所以統前所謂前朱雀也。鳥章在前其旆中央言其鮮明也。白作帛非白色也。元戎陷陣之車車縵輪馬被甲衡軛之上盡有劍戟以陷陣故王臨川云元戎選鋒也。如輕如軒車之前後適調低昂之勢。

也○首二章出師也中二章行師也未二章班師也
美宣王而及吉甫者言將之能而將將者可知也每
章皆言車及四牡四驪者西北平原利在車戰也○
首章六月以夏正言也六月句與我是用急相呼應
六月未有出師者今六月棲棲則急可知矣六月棲
棲而車飭馬強衣裳皆備倉卒中能整暇也攘夷匡
王辭義正大此則出師之本也鄭康成曰于曰也蓋
宣王之言也○二章蓋當大亂之後而車馬器械如
此則其有餘於力可知矣戎車取其齊力而已今曰
四驪者馬既有餘則亦不厭其同色也閑謂習熟也
曰閑矣又曰維則言習熟之妙隨人屈曲而終不失
其規矩所謂伏習衆神巧與法合極大道理不止乎
論馬偶於論馬言之耳六月成服所謂速也成服卽
行所謂敏也獵狁孔急而師行三十里所謂不失其
常也朱註於此章言之甚明○三章善為將者莫大
於肅與敬舉嚴翼二者合言之蓋惟敬故肅也肅敬

則可供武事而定王國矣以奏者行師之意欲求如此以定者行師之道足以如此也○四章焦穫毛傳云周地接于獫狁者漢書劉向曰吉甫之歸周厚賜之其詩曰來歸自鎬我行永久千里之鎬猶以為遠以此知鎬非鎬京故毛傳亦云鎬方皆北地也盤據于焦穫掩襲我鎬方遂遠及于我之涇陽孔熾如此所以建此旗旆選鋒銳進而不容已也幟文四句言前軍之盛也前軍如此後者可知下章戎車四牡則大隊隨之矣○五章如輕如軒說車制語簡而盡為戎車者必先求其可以自安而後可以陷敵如輕如軒則戎車既安矣輕似覆軒似却覆却自如求安者先試于不安之道所以為安也駕車之馬不恃其力而恃其閑重言既佶而繼以且閑謂不但佶而已也薄伐至大原而止所謂王者之於戎狄猶蚤蟲之螫體毆之而已古之為將必文武兼資而後功名及遠今吉甫具此文武全才所以能佐天子匡王國而為

萬邦之憲也。○六章燕喜者吉甫有功歸于飲至之後與其朋友燕喜也未點出張仲孝友句為一篇瀾其妙燕喜而得孝友之人雍容尊俎豈但上客者四坐已哉然曰諸友則不止於張仲一人矣且當時同事者又有壯猷之方叔焉詩人皆不言而言張仲一人則以其孝友也佐天子匡王國憲萬邦非孝友之人其誰成之。○萬茂先謂吉甫燕喜與頌魯侯燕喜一例還歸以下乃言私燕也不然既字無着落矣亦似可從

薄言采芑于彼新田于此畱畝方叔涖止其車三千師千之試方叔率止乘其四騏四騏翼翼路車有奭簞第魚服鈎膺偉革薄言采芑于彼新田于此中鄉方叔涖

止其車三千旂旐央央方叔率止約軼錯衡八鸞瑤瑤
服其命服朱芾斯皇有瑤蕤玼駸彼飛隼其飛戾天亦
集爰止方叔涖止其車三千師干之試方叔率止鉦人
伐鼓陳師鞠旅顯允方叔伐鼓淵淵振旅闐闐蠢爾蠻
荆大邦為讎方叔元老克壯其猷方叔率止執訊獲醜
戎車嘽嘽嘽嘽焞焞如霆如雷顯允方叔征伐玃狁蠻
荆來威

序曰采芑宣王南征也。芑苦菜青白色摘其葉有
白汁出可生食亦可蒸為茹卽今之苦蕒菜軍行采

之人馬俱可食也詩有三芑薄言采芑菜也豐水有
芑草也維縻維芑白梁栗也田一歲曰苗始反草也
二歲曰畚漸和柔也三歲曰新田已成田而尚新也
四歲則曰四矣每兵車一乘甲士三人步卒七十二
人又有一重車載輜重隨之其中炊家子十人守衣
甲五人廐養五人供給五人是每一兵車共用百人
故註云其車三千當用三十萬眾蓋極言其盛也路
車方叔所乘之車金路車也金路赤飾輿赤也簟第
以簟蔽車而車上所載又有魚皮之矢服五路惟金
路有鈎以金為之馬領之飾也馬領有鈎而馬膺又
有樊纓皆以飾路車之馬也樊馬大帶纓鞅也以五
采蜀為之條草見蓼蕭篇方叔不乘草路者以草路
為臨陣所用也以章言交龍之旂者即左以該右言
龜蛇之旒者即後以該前也車之轂以皮束之曰約
軾車前之衡雜文以飾之曰錯衡鈴在鑣曰鸞馬口
兩旁各一四馬則八鸞矣禮三命赤芾蔥珩璫玉聲

言佩慈色之珩于裳其聲琤然也隼鷁屬迅疾之鳥
稗雅云一名雀鷹或曰卽鷁也鄭云鉦以靜之鼓以
動之鉦鼓各有人焉言鉦人伐鼓互文爾然考周禮
鼓人以金鑄節鼓以金鑄止鼓原無鉦名蓋鑄鑄皆
名鉦也而節止則俱用之於鼓矣陳師而鞠之陳成
而鞠之曰陳師鞠旅者省文也陳而告之欲其守金
鼓之法為進退也伐鼓淵淵戰時進士衆也至戰止
則入而振旅又復伐鼓闐闐闐闐鼓行聲蓋振旅亦
以鼓行也○獵狁之患近北伐之事急蠻荆之患遠
南征之事緩故六月采芑詩詞各異焉○首二章美
軍容也然曰師干之試則其所訓練之素可知也且
言軍容而并及路車八鸞赤芾慈珩則其雍容整暇
又可知也故大全彭氏曰此時方叔精神氣燄已見
於旌旗車馬佩服之間矣又曹氏曰芾佩非軍服金
路非戎車和鸞非戎馬詩言及此猶吳起將戰不帶
劍諸葛武侯不親戎服羊祜輕裘而盛著威名數語

可玩錄之。○三章嚴紀律也。隼之迅疾而能止所以興師之精強而不暴也。軍中紀律皆于金鼓進退聞見之其進也鼓聲淵淵進而能和故不囂也其退也鼓聲闐闐退而能整故不亂也。孫武子所謂戰如守行如戰也。○四章美功成也。方叔惟其元老是以克壯其猷蓋老成持重不以力為壯而以謀為壯也。又深嘽嘽煒煒如霆如雷力與謀相資而壯乎征伐猷猷而蠻荆來威蓋言其威名素著先聲奪人北伐南征勢如破竹不但侈其功之多而已也。顯允猶言明信也。明信二者缺一不可成大將矣。六月美吉甫而曰文武采芑美方叔而曰顯允古人命將各見身分然皆於其平日觀之非急忙承乏苟焉而已。

我車既攻我馬既同。四牡翼翼駕言徂東。田車既好四牡孔阜。東有甫草駕言行狩之子于苗。選徒囂囂建旄。

設旄搏獸于敖駕彼四牡四牡奕奕赤芾金舄會同有
繹決拾既飲弓矢既調射夫既同助我舉柴四黃既駕
兩驂不倚不失其馳舍矢如破蕭蕭馬鳴悠悠旆旌徒
御不驚大庖不盈之子于征有聞無聲允矣君子展也
大成

序曰車攻宣王復古也○我車既同毛云宗廟齊豪
尚純也戎事齊力尚強也田獵齊足尚疾也然曰四
牡則不獨齊足而齊力矣曰四黃又不獨齊足而齊
豪矣豪謂毛色也敖山名晉師救鄭在敖山之間士
季設七覆于敖前則敖山之下平曠可以屯兵翳薈
可以設伏所謂東有甫草即此也諸侯時見曰會衆

見曰同決卽衛芄蘭所謂韞也決以骨為之拾以皮
為之決着於指拾着於臂攸謂決與拾相攸比也百
強而得矢之重弓弱而得矢之輕曰調柴積禽也三
等之殺君各取其十上奉宗廟乾豆中供賓客君
止取其下其餘以頒士大夫之習射者故不盈也
序言復古謂宣王復會諸侯于東都也蓋建國于鎡
京所以爭天下之形勝而鎮撫西南之戎狄營都於
洛邑所以攬中原之要領而節制四方之諸侯周衰
而東都朝會之禮廢矣宣王舉而行之因田獵而太
閱武事故曰復古也○首章命駕也曰既攻既同自
是中興振刷景色會同田獵俱在駕言徂東內雖不
指其事而此時布告號令既已聳人觀望矣二章出
狩也甫草田獵之地田者刈草為防驅禽獸而納諸
防中然後焚而射之也天子大蒐以耀武備而修舊
業非區區田事已也三章選徒而狩也之子者不敢
斥王故以有司言之也人衆則聲必衆然但聞數徒

者之聲則衆而且肅也教卽甫草之地也四章諸侯來會也駕彼四牡諸侯來時事也諸侯宜朱芾今日赤芾者當其會同則為臣故赤芾也繹謂絡繹不絕也中興關係俱在此章然前後但言田狩獨于中間點出人詳我畧手法便妙若今人為之不知將會同盛事如何誇耀如唐人早朝應制詩鋪張門面但取熱鬧而已五章會同之諸侯皆與獵事也射夫兼諸侯以下言也射者男子所有事夫者男子之總名也我指天子舉柴以獲多言之諸侯舉之則其下共舉之故曰助也六章射御良也四黃與六月比物四驪同皆因馬之齊色而見其有餘于馬也兩驂不倚御者能正其馬也不失其馳言御之節而法也舍矢如破言射之巧而力也二章皆極一時之選也七章言其肅而且均也肅肅二句狩獵既畢軍容整也徒御不驚嚴也大庖不盈惠也四句俱從閑冷處點盛景世景色宛然如畫八章合言其始終皆肅也聞獵而

不聞獵之聲卽一獵而馭衆之法已如此矣是以信其為君子而必大有成也有聞無聲四字可以意會而不可言求既已有聞何云無聲既云無聲何以有聞且三章曰選徒囂囂則有聲矣七章曰蕭蕭馬鳴則又有聲矣既有聲矣而謂之無聲此非至肅者不能也至肅者宣王精明之氣中興之象也晉人伐鄭陳成子救之舍于柳舒之上去穀七里而穀人不知若陳成子者可謂肅矣而不可謂至肅也蓋無聲者肅也惟有聞而無聲則至肅也有聞無聲者不按轡不御枚而人自不聞其聲也然則雖八鸞鎗鎗伐鼓淵淵而詩人以為此皆有聞無聲者也

吉日維戊既伯既禱田車既好四牡孔阜升彼大阜從其羣醜吉日庚午既差我馬獸之所同麀鹿麀麀漆沮

之從天子之所瞻彼中原其祁孔有儻儻俟俟或羣或
友悉率左右以燕天子既張我弓既挾我矢發彼小豝
殪此大兕以御賓客且以酌醴

序曰吉日美宣王田也○內事以柔日外事以剛日
祭祀內事也田獵外事也故戊與庚午皆剛日也伯
馬祖卽房星也房四星龍為天馬故房星曰天駟主
車駕周禮夏官校人春祭馬祖今將用馬力故又禱
之也漆沮在涇水之東此云漆沮之從猶車攻言教
與甫草也豝牝曰豝殪一發而死也兕野牛重千斤
一角青色善抵觸其皮堅厚可以制鎧發豝殪兕言
能中微而制大也○前章狩于東都此章田于西京
也從禽者古人所誠而車攻吉日美之不置者從宣
王中興之氣象言之也故呂東萊曰可以見王賦之

復焉可以見軍實之盛焉可以見師律之嚴焉可以見上下之情焉可以見綜理之周焉蓋一事而數善具矣○首章獵具備也升彼大阜二句預言車牢馬健欲以升阜從醜此時尚未升未從也二章言所獵之地也差擇也言于孔阜之中擇而齊其足也獸之所同四句猶言獸之所聚在何地歟其在漆沮是從獸漆沮之地固天子田獵之所也三章方獵而人心順也中原承漆沮而言毛云祁大也言大而且順也鄭康成改祁作塵不知何據儻儻趨而爭先之貌獸三曰羣曰或羣則非一羣已也獸二為友曰或友則非一友已也即此八字畫出禽獸充牣形態如遊上林雲夢之間如見長楊羽獵之盛或羣或友尤得野類性情竟是李伯時趙子昂得意妙筆矣左右從王之人也悉率左右射者御者各自相率以安侍天子人心効順于此二語見之亦猶車攻之射夫既同助我舉柴也四章畢獵而禮儀備也既張二句承上章

悉率言之發彼二句言巧與力齊也天子得禽不以
自奉而命有司以進賓客且更酌醴以燕諸侯與羣
臣亦猶車攻大庖不盈之意也

鴻鴈于飛肅肅其羽之子于征劬勞于野爰及矜人哀
此鰥寡鴻鴈于飛集于中澤之子于垣百堵皆作雖則
劬勞其究安宅鴻鴈于飛哀鳴嗷嗷維此哲人謂我劬
勞維彼愚人謂我宣驕

序曰鴻鴈美宣王也。一丈為板五板為堵五堵為
雉曰百堵非一家也。續序云萬民離散而宣王能
勞來還定安集之然詩作于安集之後而猶追叙其
離散之苦者蓋痛定思痛故哀鳴在安集之日為甚

但言時昔離散之苦而安集之德乃見故曰美宣王也。○首章思往日也。鴻鴈春避暑而北秋避寒而南當其避也但聞羽聲肅肅而苦以與人民離散故夫子往而勛勞于野且其勛勞可矜之人皆鰥寡也蓋離散之時室家相棄無人而非鰥寡又不但老而無妻老而無夫者矣。二章樂安集也以水鳥之集中澤與流民之歸故鄉既歸故鄉是以築室以居百堵皆作雖勛勞而終獲安宅也既歸則獲安宅矣而曰究者以此時尚有築堵之勞也。三章述作歌之意也哀鳴嗷嗷所以作歌之意哀鳴在百堵交作之後其意則喜而其情愈悲然惟此哲人知我之所歌者時哀昔日之勛勞而情不能已耳若彼愚人顧以我獲今日之安集而宣驕欲如哲人之知我得乎蓋峽猿之慘惟斷腸者知之促織之恨惟久客者聞之哀絲悲管自非愁人皆以為歡笑之資耳蓋當時作歌之人預求知己之難如此亦可傷矣。

夜如何其夜未央庭燎之光君子至止鸞聲將將夜如何其夜未央庭燎晰晰君子至止鸞聲嘖嘖夜如何其夜鄉晨庭燎有輝君子至止言觀其旂

序曰庭燎美宣王也因以箴之。中央中央也未央猶云未及中也庭燎者樹之于庭而燎之也司烜供之樹於門外曰大燭門內曰庭燎郊特牲註曰庭燎之光公五十侯伯子男皆三十天子用百。按列女傳宣王常晏起姜后脫簪珥待罪于永巷宣王感悟勤于政事早朝晏退固宜有庭燎之詩也。三問夜如何其想見皇皇不敢安寢之意夜未央問中語也猶云豈夜尚未央乎庭燎以下皆想像之語猶云庭燎已光矣君子已至而聞其鸞聲矣未艾急於未央卿晨又急于未艾庭燎夜發則光盛迫曉則光漸微而

晰晰鄉晨則烟光相雜惟見火氣矣鏘鏘僅聞其聲
噦噦則聲漸近而聞其和至觀其旂則已辨色矣此
立言之序也

汚彼流水朝宗于海馱彼飛隼載飛載止嗟我兄弟邦
人諸友莫肯念亂誰無父母汚彼流水其流湯湯馱彼
飛隼載飛載揚念彼不蹟載起載行心之憂矣不可弭
忘馱彼飛隼率彼中陵民之訛言寧莫之懲我友敬矣
讒言其興

序曰汚水規宣王也。朱註以此為憂亂之詩夫曰
憂亂則規宣王之意有在矣毛鄭所解殊為牽強蓋

序意本深特以毛鄭一人舉詩中之言字字求合于序遂覺序意反淺耳。○憂讒卽憂亂無二意也周室厭亂久矣詩人於宣王中興之日懼亂之又生也故歌此憂亂之詩以規之末章訛言讒言在當時必有所指特無從考核耳。○首章言水猶有歸鳥猶有止何以人獨不念亂乎曰兄弟曰邦人曰諸友已盡乎人矣而皆莫肯念亂一身遇亂固不足念豈父母遇亂而亦不肯念乎亂卽暗指讒言之人念亂則必思所以止亂舉父母為言者蓋以人所最切者動人也二章以水盛隼揚興已憂方深也不蹟猶言不道也亦指讒者而言載起載行言憂思之甚寢處不安而或起或行也此句描寫憂態工甚不可弭忘蓋欲強為抑制而自不能已也三章言鳥不自縱而人反縱讒也訛言卽讒者之言流布而成訛也訛言寧遂莫之懲乎使有以懲之則讒止而訛息矣今既莫之懲則當盡其在我而已敬者盡其在我之謂也我友兩

能敬矣不懲人而自懲讒言又何自而興乎然則敬者念亂之寶而止讒之方也

鶴鳴于九臯聲聞于野魚潛在淵或在于渚樂彼之園爰有樹檀其下維籜他山之石可以攻玉

序曰鶴鳴誨宣王也○鶴似鵠長頸竦身高脚頂赤身白頸尾黑常夜半鳴淮南子曰鷄知將旦鶴知夜半性善驚行必依洲巽止必集林木其鳴高亮聞八九里臯澤也鄭云臯澤中溢出所為坎自外數至九喻深遠也又韓詩云九澤九折之澤也穀惡木也一名楮其皮可以為紙○此詩凡四層每一層作一喻

全不露出正意毛鄭專主求賢朱註分明好惡各有一見然總勿道破更覺味長蓋四喻中立言甚廣取義甚圓目擊道存觸境皆是自求治用人學問經濟涉世居身觀變體物以及日用居室之間萬事萬物無往而不在焉若執一辭以求之舟痕未移劍去久矣○鍾伯敬曰此如易之取象不止于譬喻也
祈父予王之爪牙胡轉予于恤靡所止居祈父予王之爪士胡轉予于恤靡所底止祈父亶不聰胡轉予于恤有母之尸饗

序曰祈父刺宣王也○祈與圻同卽畿也圻父司馬也司馬所屬曰司右曰虎賁曰旅賁皆奉事王之左右也○不敢怨王而怨圻父所以深于怨王也宿衛非遠戍之卒孤子非從軍之人一事而兩失焉所以

刺也

皎皎白駒食我場苗繫之維之以永今朝所謂伊人於
焉逍遙皎皎白駒食我場藿繫之維之以永今夕所謂
伊人於焉嘉客皎皎白駒賁然來思爾公爾侯逸豫無
期慎爾優游勉爾遁思皎皎白駒在彼空谷生芻一束
其人如玉毋金玉爾音而有遐心

序曰白駒大夫刺宣王也。藿豆葉也用以作羹。○
繫之維之及金玉爾音皆大夫之言也宣王之時賢
者不用而去故大夫代為招隱之辭招之不可而欲
其毋金玉爾音則好德之至也其刺宣王處即于讚

嘆愛惜無已處見之今人皆傳宣王口中語不獨有
戾序旨且豈有天子留客而繫其食苗之駒者鄭莊
置驛陳遵投轄遂與周天子繫駒共成佳話矣豈不
可笑○食苗繫駒皆托言也留賢而欲留其所乘之
駒又美駒之食我苗藿而繫之維之以作一朝之逍
遙一夕之嘉客蓋重惜其去知不可留而欲以一朝
一夕之歡為永也永字活甚趣甚○三章知不可留
而姑為款曲慰挽之詞蓋無聊之思無已之情也爾
公爾侯作大夫口中語便妙若作天子自語則公之
侯之可矣何待商量乎若謂爾其貴然而來乎爾之
來也天子將以爾為公為侯則爾之逸豫無期矣何
必以優游遁思為逸豫乎慎勉云者挽留極苦之語
蓋深恐其優游遁思也○四章則果不可留矣繫維
既無所用公侯亦不可待惟秣以束芻而深美其
之如玉如二疏去國道路之人望其車塵嘆息以為
賢者而已至於目斷心傷但欲惠我好音眷戀繼繼

傷于渭城之曲迫于小山之辭矣○遐心卽註所謂
達我之心與陶詩達心不同蓋在彼空谷卽所謂達
心也此遐心從金玉爾音看出不過望其於空谷之
中不我遐棄而已高人去國一往不顧為此言者朋
友無聊之極思耳鍾伯敬譏考亭未讀陶詩不知此
處遐心二字深求之則味淺不若淺求之其情深也
黃鳥黃鳥無集于穀無啄我粟此邦之人不我肯穀言
旋言歸復我邦族黃鳥黃鳥無集于桑無啄我梁此邦
之人不可與明言旋言歸復我諸兄黃鳥黃鳥無集于
栩無啄我黍此邦之人不可與處言旋言歸復我諸父
序曰刺宣王也○宣王之初舉流離之民而勞來還
定安集之於是乎有鴻鴈之歌當時異鄉失所者或

相率而歸于王迨其衰也政急俗偷州里族黨相恤
之禮微而民始咏黃鳥矣婚姻故舊相調之情虧而民
始咏我行其野矣民生無依怨懟復作以莫非王土
之民而曰此邦曰復我邦族故曰刺也○黃鳥者異
鄉來歸之民呼本國之人而告之如所謂無寓人於
我室我將反也首邦族次諸兄次諸父情愈親而思
愈苦矣○不可與明謂不能察
人之疾苦猶云聽之不聰也

我行其野蔽芾其樗昏姻之故言就爾居爾不我畜復
我邦家我行其野言采其葍昏姻之故言就爾宿爾不
我畜言歸思復我行其野言采其葍不思舊姻求我新
特誠不以富亦祇以異

序曰刺宣王也。○樗莊子所謂擁腫卷曲不材之木也。蓬惡菜也。一曰牛蒡。一曰羊蹄菜。似蘆菔而長赤。梅誕生曰蓬。一名馬尾草。一名蕩。一名蔞蔞。亦惡菜也。一名當大葉。白華白根。○此詩大意註所引臨川王氏論之詳矣。重言昏姻之故。見相依非無因也。至于不我畜而終無憾詞。但曰復我邦族。言歸思復而已。蓋其厚也。厭貧而趨富。此風俗所以日偷也。然詩人以為此非以人之富而棄我之貧。特以我之故有異于彼之新耳。似代為出脫者。然此則忠厚之至也。然詞愈婉而意愈深矣。

秩秩斯干。幽幽南山。如竹苞矣。如松茂矣。兄及弟矣。式相好矣。無相尤矣。似續妣祖。築室百堵。西南其戶。爰居爰處。爰笑爰語。約之閣閣。椽之橐橐。風雨攸除。鳥鼠攸

去君子攸芋如跂斯翼如矢斯棘如鳥斯革如翬斯飛
君子攸躋殖殖其庭有覺其楹噲噲其正嘖嘖其冥君
子攸寧下筦上簞乃安斯寢乃寢乃興乃占我夢吉夢
維何維熊維羆維虺維蛇大人占之維熊維羆男子之
祥維虺維蛇女子之祥乃生男子載寢之牀載衣之裳
載弄之璋其泣嗶嗶朱芾斯皇室家君王乃生女子載
寢之地載衣之裼載弄之瓦無非無儀唯酒食是議無
父母詒懼

序曰斯干宣王考室也。○竹叢生行鞭深遠故曰苞伊洛以南雉素質五采皆備成章曰翬雉熊似豕山居冬蟄當心有白脂如玉謂之熊白其味甚美其胆春在首夏在腹秋在左足冬在右足好舉木引氣所謂熊伸是也冬蟄不食饑則自舐其掌故其美在掌羆似熊而大猛慙多力能拔大木遇人則攫之俗云熊羆眼直惡人橫目也虺似蛇細頸大頭色如文綬大者長七八尺稗雅云虺小於蛇銘曰為虺弗摧為蛇奈何是也蛇古字作它古人少畏患它故相問曰無它稗雅曰魚屬連行蛇屬紆行故曰委蛇委蛇莞蒲席也濮氏又謂即澄心草竹簾所以覆席也。○古入成室必燕飲以落之則有頌禱之詞故凡稱宮室制度之美者所謂頌也如張老以美侖美奐為頌也凡稱似續子孫兄弟室家所謂禱也如張老以歌哭聚國族為禱也然篇中首言兄弟終言子孫尤屬美頌善禱使有國家者兄弟無箕豆之泣而子孫有瓜

隄之繁天下之福孰大于是哉○首章頌宮室而禱
其兄弟相好蓋其宮臨水而面山故秩秩言其水之
環幽幽言其山之遠其下如竹苞以言其基之固其
上如松茂以言其工之密而又祝其居是室者兄弟
相好而無尤此二句一正一反禱不忘規所謂善禱
也蓋惟相好無尤故能聚國族于斯一或戾焉雖欲
長保是室不可得矣繼體之君所嫌逼者莫如兄弟
故相好無尤從其久遠言之也二章頌宮室而禱其
似續妣祖曰似續妣祖則中興堂構維新在是矣為
室者先其垣墻言百堵者舉外以包其內也西南其
戶則堵以內之制矣言西南者舉西南以該東北也
居處笑語則所謂歌于斯也三章頌其垣墻之美而
為君子攸芋蓋築室者板築之固如此則風雨鳥鼠
可無慮矣天子之尊大豈在宮室雖茅茨土階未嘗
不尊大也所謂尊大亦就其規模氣象言之耳若蕭
何云非壯麗無以示威唐人云不觀皇居壯安知天

子尊則非詩意矣四章由垣及堂而頌其為君子攸
 躋前四句註解已明若其形容工妙則張平子班孟
 堅賦中數百言不能悉者此以四句寫之君子攸躋
 天子氣象儼然在望矣五章由堂及室而頌其為君
 子攸寧正者陽室也曰噲噲其正則下句之為偏可
 知矣寔者陰室也曰噦噦其寔則上句之為明可知
 矣寧謂休息也六章則由堂而及於寢矣自此以下
 皆禱辭也乃占我夢禱者設為夢語筆意空幻與前
 數章映帶聯絡妙在無端若無此數段便似後代宮
 殿通用麗語不見古人文字波瀾矣七章設為占夢
 之語也八章九章設言占夢而驗也至此想愈幻而
 意愈達矣裳下飾璋半圭不衣而裳不圭而璋者成
 人有漸故也為天子之子孫則朱芾矣有室有家生
 人之常為君為王又天子子孫之常而禱者必及於
 此所以豫祝其成人之福也女子豈可有非乎又豈
 可有儀乎無非見女子之德無儀見女子之福蓋女

子惟所遭不幸而後有善可見若福德之女吉祥無事則但無違夫子而已若揭揭然自著其善是即非之大者矣故必無儀然後見其無非猶易之言無咎無譽者必無譽然後見其無咎也下二句乃其所以為無非者酒食中饋女子之事舍此皆外事矣女子而強與外事此父母所憂也故曰無父母詒雁

誰謂爾無羊三百維羣誰謂爾無牛九十其牯爾羊來思其角濺濺爾牛來思其耳濕濕或降于阿或飲于池或寢或訖爾牧來思何蓑何笠或負其餼三十維物爾牲則具爾牧來思以薪以蒸以雌以雄爾羊來思矜矜兢兢不騫不崩麾之以肱畢來既升牧人乃夢衆維魚

矣旒維旗矣大人占之衆維魚矣實維豐年旒維旗矣

室家溱溱

序曰無羊考牧也。○羊性善羣每羣以一雄為主舉羣聽之俗所謂壓羣是也。羊以瘦為病六畜之死皆善死敗而羊為甚有疾輒相汙故善牧羊者求其不羣不崩而羣虧也。崩羣疾也。羊羣則欲其和戢戢者和也。牛病則牛燥濕濕者潤澤也。牛之黑唇者曰特黑背曰牝黑耳曰羣言其特者則其餘可知也。稗雅曰牛耳無竅常以鼻聽故盟于神者必執牛耳蓋以不聽為戒也。○斯干考宮無羊考牧皆有頌禱之辭蓋宣王當大亂之後賤饑流離所不能免故於考牧之詩而以年豐民殷為禱首三章言牧事之盛末章則因牧事而言富庶之祥所謂禱也以誰謂發端驚喜之辭見畜牧耗而復盛也。羊之和於角見之牛

之安於耳見之言其安且和則牛羊之盛可知矣角
藏耳濕已具畫意降池飲阿或寢或訛則不獨畫其
形體并其性情而形容之矣韓退之畫記一篇皆從
此三句脫出爾牧來思以下又畫出牧人何蓑笠負
餼糧奔走追隨於風雨隴畝之中筆墨生動光景閒
適妙絕三十維物備色也爾牲則具備用也皆所以
言其盛也三章又從牧人取薪蒸搏雌雄言之蓋牧
者既有餘閒則牛羊之欣欣可知已矜矜以下專言
羊而不及牛者蓋牛馴羊躁故羊易耗敗牧羊者得
其性則無騫崩之患故舉羊而牛可類推也矜矜羊
愛牧人也兢兢羊畏牧人也古人豢龍馴虎各有其
道時其饑飽審其欲惡故雖暴物可擾而狎也今牧
羊者能得羊之饑飽欲惡使羊愛而畏之矜矜然兢
兢然惟牧者之命是聽故不騫不崩之羊無待鞭策
但麾之以肱而三百之羣皆畢來既升矣蓋人之與
羊始則相狎既而相忘則得其性之故也未章幻出

牧人一夢最為奇絕蓋前三章但侈畜牧之富則一
烏氏僕谷量牛馬可以當之矣與中興天子有何關
涉故此處將歲豐年和生齒繁庶之事從牧人夢中
寫出映帶聯絡離合斷續妙在無迹衆魚旒旌夢境
恍惚占夢數語尤為空幻誦詩者但觀其大意所在
而已若必求其說而實之則所謂痴人說夢也